

Mbanjmyauz Yijbuz “Ndaw Rog Haimax” Roemx Ok Sei qgyaiq Moq

雨卜苗寨“内外兼修”闯出新天地

□ Maj Veiyungz comz hoiz

Dahloegyaz diuz dahnga Dah-beigyangh con gvaq ndawmbanj, song hamq fwjmok ngeungeu, ndoeng faexcuk、faexsamoeg mwncupcup、heucwdcud, baenz gan baenz gan laeuz hwnq youq henz nazmbaeklae henjrwkrwk haenx. 9 nyied, Mbanjmyauz Yijbuz cingq deng seiz dajsou, lengqlengq cungj gyaue dwk lumj fukveh nei. Loz Yaujlinz, boux daih’it suhgi Mbanjyijbuz caemh sim’ angq dangqmaz. Aenvih ndawmbanj gyoengq mehmbwk laeng aen dieggiek yienh gaep cauhnieb fuhva caeuq aen dieggiek ciepcienz nyumx-lab Myauzcuz ndaej bae Liujcouh、Nanzningz langhbaij gij makbaenz gyoengqde. 6 boux vunz 18 cungj doxgaiq bae camgya doxdax, aeu ndaej si gaep aen gimciengj、song aen dungzciengj caeuq swicigih gaep song ngaenz song dungz caeuq aen youhsiu ciengj ndeu. Mbanjyijbuz cawjdaez dwk fukbaiz miz daegsaek minzcuz、haenqrengz hwnghat lijyouyzez, aeu ndaej ciengj doiq gyoengqde ma gangj dwg gienh saeh ndei ndeu.

Mbanjyijbuz dwg aenmbanj gig miz daegsaek Myauzcuz ndeu, gyauejvunz Myauzcuz ciemq gyauejvunz daengx mbanj 95%. Gij minzsug vwnzva lumj ganranz Myauzcuz、dajndaem、buhvaq、dajgwn、aenvenz、daeug max daengj cungj ce ndaej haemq ndei. Mbanj neix baengh gij gingjsaek gyaunde caeuq yienghndei Myauzcuz naekna haenx haiguh aen Ginggih Yijbuz Mbanjmyauz, youq Yungzsuij dwg aenmbanj hwnghat lijyouz haemq caeux ndeu. Bi 2006 ndwen 11, aen ginggih neix ndaej bingzguh “daengx guek aendieg guhyiengh guh nungzyez lijyouz”, bi 2010 ndwen 11 cix ndaej bingzguh “guekgya gaep AAA ginggih”. Mbanjbuzling, aen Mbanjyijbuz guenj haenx youq bi 2012 aeu ndaej gij mingzdaez “aenmbanj mizmingz aencin mizmingz” swicigih, bi 2014 lij aeu ndaej gij mingzdaez “Cunghgoz aen mbanj miz gij daegsaek siujsoc minzcuz” dem.

Loz Yaujlinz cap mbanj gaeng ndaej song bi buenq lo, de yawj dwk aen mbanj iq neix hwnghat hwnj-daeu. Daj diuz roen ndawmbanj bienqbaenz roen siujniz doxdaeu, ginggih bienq ndaej engq gyaue lo, hekyouz caemh haemq lai lo. Daj bi’ gvaq doxdaeu, mauhgya 11 fanh vunz daeu daengz gizneix guhcaemz, ginggih canjiz 500 lai fanh maenz. Ndawmbanj an le lohdaeng daiyangznwngz, gyanhaemh de byaij youq ndawmbanj, raen lai rongh haujai, yienghneix doiq vanzging ndei, bae dien noix hix haemq ancienz.

Mbanjyijbuz ndaej guh ndei gij



▲Nazhaeux henjrwkrwk、fwj geuj bya sang.

sezsih giekdaej dwg aenvih Yungzsuij dinghvi ndaej cinj, mbanjde caiq baengh gij swhyenz lumj gij daegsaek siujsoc minzcuz daengj roengzrengz guh lijyouz. Bi 2005, yienh neix aeu 50 fanh maenz cingj le Dungzci Dayoz Gveihva Sezgiyen bien ok bonj 《Aen Gveihva Baujhoh Gij Mbanj Minzcuz Yungzsuij Myauzcuz Swciyen》, bi 2012 couh haifat ranzmbanj daengx yienh, dazyinx gyoengqvunz cauhsuh ranzmbanj Myauzcuz.

Bi 2017, yienh neix ok le 《Yungzsuij Myauzcuz Swciyen Gij Banhfap Camhseiz Baujhoh Caeuq Hwnghat Gij Ranzmbanj Miz Daegsaek Siujsoc Minzcuz》, ndawde gvendaengz baenzlawz nyinhdingh aenmbanj miz gij daegsaek siujsoc minzcuz、gveihva、douzsw、guh canjnieb、yienghceij aenmbanj、siufuengz ancienz、hoh ndei swnghdai vanzging、swnghcanj gwn-daen daengj.

Gyawj geij bi neix doxdaeu, gak bouhmonz caeuq vunzmbanj caez sim comz rengz bae cauhsuh doengh gij sezsih giekdaej lumjbaenz aen doumbanj Myauzcuz、diuz roqranz yawj gingj、diuz saeu aenvenz、diegdangz aenvenz、diuz mieng、diegzhaex daengj. Daengx mbanj bienq ndaej engq caezcingj gyaunde, engq miz gij daegsaek minzcuz lo.

Aen ginggih Yijbuz engq miz mingz, lijyouz canjnieb hix guh ndaej engq hoengh, haujai vunzmbanj cungj ndaej gwn gij “haeux lijyouz”. Gyoengqde guh gij canjnieb lumj biuriuz、dajndaem raet faexcuk、youq ndawndoeng ciengx gaeq daengj. Gij gingjdiemj lijyouz caeuq nungzgyahloz daiqdoengh le 54 hoh ranzgunzhoj 130 vunz demsou.

Bi 2018 ndwen 7, baihgwnz bued le 50 fanh maenz ngaenz cizdij

ndawmbanj roengzma, Vunzmbanj Hozcozse Mbanjyijbuz aeu gij cienz neix cawx le gij gujfaenh Lungzyij Sanhcangh, ndawmbanj couh miz cizdij gingheci lo. Daengz bi 2019, mbanj neix miz 98 hoh 406 vunz ndaej duetgungz, bi 2015 gungzhoj fat-senglwd daj 30.40% roengz daengz 1.80%, bi 2019 daengx mbanj cungj ndaej duetgungz liux lo. Bi 2020, cizdij gingheci ndawmbanj sou hauej 26.1 fanh maenz.

Mbanjmyauz ndaej duetgungz le, baezlaeng yaek baenzlawz byaij ne? Daengx yienh gak mbanj cungj guh lijyouz liux, Mbanjyijbuz aeu baenzlawz laebdaeb guh roengzbae ne? Loz Yaujlinz caeuq gizeyawz gunghcoz duiyenz cungj ngeix bae ngeix dauq.

Loz Yaujlinz ngeix daengz gij dinfwngz conzdungj guh buhvaq Myauzcuz、daemjrok、nyumxlab. Bi 2020 ndwen 5 ngoenz 1, aen gungh-swh Liengz Siujcez bouxciepcienz guh dinfwngz buhvaq Myauzcuz cauhsuh haenx couh bienqbaenz ndawyienh aen dieggiek cauhsuh fuhva lo. Aen dieggiek neix gungh sou le 31 hoh vunz (miz 17 hoh dwg ranzgunzhoj), caiq cujciz doengh boux mehmbwk dawzranz fwngzsoem de siuqva、daemjrok, gai gij doxgaiq gyoengqde guh haenx.

Vunzmbanj ndaej youq ndawde gai huq, doengh boux mekmbwk dawzranz youq bakranz couh miz hong guh、ndaej demsou, youh ndaej ciepcienz caeuq fatyienz gij dinfwngz minzcuz dem. Loz Yaujlinz mbouj rox guh gijneix, hoeng de roxnyinh gij doxgaiq neix ndei dangqmaz, ndigah de guh bouxdaemcengj he. De gaenxmaenx bae ra gij bouhmonz doxgven, doeklaeng coibaenz aen dieggiek youq Mbanjyijbuz an’ gya.

“De ak raixcaix, guh gijmaz cungj siengj baenzlawz hawj ndawmbanj bienq ndaej engq ndei.” Liengz Siujcez yienghneix haenh Loz Yaujlinz. Mwh ngamq haindu guh cix mbouj miz ngaenz, ndaw dieggiek lien daizdaengq cungj mbouj miz, dwg Loz Yaujlinz caeuq song boux duiyenz cap mbanj bae danhvei bangbaengh haenx ceng’ aeu buek daizdaengq ma.

Liengz Siujcez bineix ndaej 49 bi, dwg swicigih gaep feihyiz bouxciepcienz gij dinfwngz guh buhvaq Myauzcuz、“Lauxcangh Liujcouh”、bouxdaehsae gunghy meijsuz Liujcouh Si. De 13 bi couh haindu hag Siuqmyauz lo, bi 2006 de youq Mbaujyijbuz hai aen diengzhong guh buhvaq Myauzcuz, gij doxgaiq de siuq haenx lij aeu ndaej guekgya ciengj. Lumj bi 2020 “funghvuengz gim” doxdax cauhsuh sezgi doxgaiq aeu ndaej gimciengj. Haujai vunz cungj coi de bae ndawyienh roxnaeuz ndawsi hai diemq, hoeng de mbouj maij. “Gou siengj louz youq mbanj dou, miz hek daeu gou lij ndaej guh bouxgangigaij he, hawj vunzwnq cungj rox gij vwnzva Myauzcuz dou.”

Liengz Siujcez gangj, gij dinfwngz Mbanjyijbuz youq gwnz lizsij gig mizmingz, gaxgonq seiqhenz mbanj lij aeu gij baengz ndawmbanj ma guhyiengh. Daengx yienh caenh gag Liengz Gveiciuh caeuq boux lwgbawx de Gyaj Yaz rox guh nyumxlab Myauzcuz conzdungj lo. Gij faexsamoeg、raiz aennyenz、va daengngoengz daengj yienghraiz gyoengqde veh haenx cix dwg Yungzsuij gag miz. “Danghnaeuz songde mbouj guh lo, doengh gij yienghraiz neix couh aiq raeg lo.”

Vihle hawj gij dinfwngz conzdungj ndaej ciepcienz, Liengz Siujcez sou le lwgsae, baengh aen dieggiek bae doigvangq gij Baengzmyauz、Siuqmyauz、nyumxlab, daiqdoengh gij beixnuengx fwngzsoem de bae doxdax. Caeuq doenghbaez gag bae doxdax mbouj doengz, mbat neix dieggiek miz geij boux cejnuengx doengzcae bae doxdax, mbangjboux mbat daih’it bae couh aeu ndaej ciengj ma, neix hawj de roxnyinh gig miznaj. “Gaxgonq mbouj caengz camgya gvaq, ngeiz swheij guh ndaej ndei mbouj ndei ne? Swheij yawj mbouj hwnj swheij, couh engqgya mbouj miz vunz yawj ndaej hwnj mwngz lo. Seizneix bae doxdax, guekgya、cwngfuj yawj ndaej hwnj gij doxgaiq dou, aensim gou angq dangqmaz.” De maqmuengh minzcuz vwnzva hwnghat ndaej engq ndei, dinfwngz cij miz vunz ciepcienz, de doiq baezlaeng Mbanjmyauz hwnghat gig miz saenqsim.